

buit. itaque eam demum ad Maleam nactus, muneribus & commeatu largiter praefecto classis missis, ad Mitylenem expugnandam prope invitus una se contulit: cum Galli nihil ea de re antea cum illo communicavissent, neque quid sui consilii esset, ab eo petiissent: nihilo tamen secius omnibus in rebus suam illis operam praestitit. Itaque tormentis expositis, Galli nostrique oppidum aggressi, muro dejecto, repulsis atque occisis propugnatoribus, magno impetu ipsum ceperunt. Arcem oppidi autem, sine qua teneri oppidum non poterat, cum jam Veneti turri dejecta signa in muros intulissent, idemque Ligures ex classe Gallica Venetis proximi fecissent; tamen capere non potuerunt, quod duorum praefectorum interitu, quos hostes interfecerant, Galli perterriti se in castra receperunt. Erant autem ex Armoricis finibus plerique, qui suorum ducum dicto audientes non fuerunt. eos se recipientes caeteri omnes subsequuti, oppugnationem reliquerunt: ita victoria jam plane parta, si suum Galli munus obissent, interpellata pedem retulit. Accidit autem ab Thracibus ea in oppugnatione res permira, quae virtutem illorum atque animum ostenderet. Nam cum tot navibus oppidum obsideretur, tot hostium millia circumfusa ad muros stationes haberent: una in biremi & tribus navigiis milites trecenti a Bajasetis filio e Magnesia, cui praerat, auxilio missi, in arcem se inferre velle non dubitaverunt: sed ab Gallis intercepti, cum se fortissime defendissent, reliquis interfectis viginti eorum Gallos elapsi, quo intenderant, tenuerunt, atque in arcem recepti sunt. Praefectus classis ea spe dejectus, Pisauro relicto, discessit: tempestate turbidissima deprehensus ad Cytheram insulam navi sua elisa, ex hominibus quingentis, qui in ea erant, ipse perpaucaeque, qui se in parte navis fracta scopuloque infixi continuerunt, evaserunt. Navis ex hujus classe altera cum sexcentis hominibus interiit.

1501
Mitylenis
oppugnatio.

Pisaurus, multis diebus ad bellum gerendum idoneis Gallorum causa frustra consumptis, hyeme praecipiti se ad Melum insulam contulit. Forte ibi Ericus Thrax,